

韓大中丞奏議

韓大中丞奏議

受業 魏源
丁嘉祿 編次

次孫泰 華敬錄

卷之八

目錄

審擬彭澤縣虧空疏

請分年扣還盤壩經費銀兩疏

請將候選衛守備革審疏

編查保甲棚民疏附片

謝賞福字並鹿肉等件疏

請分年緩扣幫丁借支銀兩疏

審辦德化縣地方疎失鞘銀疏

拏獲會匪審明定擬疏

懇恩寬限買補缺穀疏

審擬泰和縣民陳明開京控疏

請將知縣降補佐貳疏

審擬旂丁蕭靜亭京控疏

審擬候選衛守備李廷傑滋事疏

審擬吉水縣監生鄧輝等京控疏

請將李光海李白腦緩決疏

覆查保甲完竣疏

審明安福縣逆倫重犯疏

審擬彭澤縣虧空疏

奏為遵

旨審擬恭摺仰祈

聖鑒事竊照前任彭澤縣甄別降補知縣周巖短交
庫項霉變倉穀經前撫臣成格叅

奏奉

旨這所叅短交庫項霉變倉穀之前任江西彭澤縣
降補知縣周巖着革職拿問交該撫提同丁胥人

等嚴審實情按律辦理該革員任所資財及原籍家產一併查封備抵欽此遵卽飭提人證來省委員審辦旋據南昌府知府周繼炘訊擬由藩臬兩司審解前護撫臣嵩溥因正值卸事移交前來臣隨親提研訊緣周巖籍隸江蘇由江西鄱陽縣縣丞陞授彭澤縣知縣嘉慶二十三年二月到任道光三年六七月間隣境德化縣因江水泛漲田畝被淹致成偏災經前撫臣程含章

奏請發銀賑濟各災民不待銀到散給紛紛出境
赴彭澤縣求乞其時湖北黃梅等縣亦被水成
災流民入境者尤多周巖因饑民在境恐滋事
端當按男婦大小丁口散給口糧撥役雇船資
送回籍待賑後因日逐接踵而至給發口糧銀
兩為數甚鉅周巖一時無措將徵存道光二年
餘租銀一千九百三十九兩一錢九分二釐嘉
慶二十五年緩徵餘租銀七百六十九兩四錢

七分三釐共銀二千七百八兩六錢六分五釐
挪移散給又道光三年四月二十五日周巖將
徵存道光元年餘租銀三千四百二十六兩七
分四釐三年地丁正銀四千二百兩起具文批
僉派家丁孫祥差役陳應管解前赴藩糧二庫
投兌經由陸路前進是日巳刻至縣屬金剛料
地方渡江船至江心陡遇暴風大雨將船打翻
銀批全行沉溺丁役及船戶汪幅等俱各落水

飄淌下游經漁船撈救上岸趕回報知周巖前
往看明雇人打撈因大江險要水深溜急打撈
無獲周巖因沉失銀兩總須賠補未經稟報隨
挪移續徵道光三年地丁正銀一千七百一十
兩四錢四分四釐三年稅契銀九百五十兩四
分九釐三年漕運正銀一千一百四十二兩六
錢八分九釐耗銀一百一十四兩二錢六分九
釐另自添補銀二百八十二兩五錢四分九釐

湊成四千二百兩補解藩庫又挪移續徵三年
餘租銀三千三百七十二兩八分四釐另自添
補銀五十三兩九錢九分湊成三千四百二十
六兩七分四釐補解糧庫又彭澤縣倉廩七十
三間原係堅固道光三年四月初五日暴風大
雨將秋字四廩瓦片吹落一時搶護不及倉貯
穀石被雨淋濕經倉書王幅瑞報知周巖往看
設法遮蓋時值連日陰雨不能晒晾以致霉變

穀四千一百三十四石四斗五升趕緊變糶每
石僅變銀二錢二分五釐共變銀九百三十兩
零二錢五分按照時值先買補穀七百石上倉
尚缺穀三千四百三十四石四斗五升周巖原
想在任陸續賠補旋經前撫臣程含章以周巖
才不明敏辦事麤疎奏奉

諭旨以府經縣丞降補卸事未及補苴經署縣史念
徵查出前項虧缺銀兩及霉變倉穀移交前縣

陳徵芝會同監盤筭明由府道詳揭叅

奏奉

旨革審據供前情不諱臣以該革員周巖所供給散
饑民口糧何竟用銀至二千七百餘兩之多又
沉失銀兩霉變倉穀均未詳報焉知非侵蝕入
己捏詞卸罪嚴加究詰矢口不移查核現署彭
澤縣張復申送散給饑民口糧印冊銀數相符
並據勘明金剛料地方實係大江險要水深溜

急倉廩四座委被風雨損壞淋濕穀石訊取船戶渡夫人等各供結均與周巖所供吻合案無遁飾查例載挪移庫銀五千兩以上者擬實犯杖一百流三千里限一年全完免罪開復又律載倉庫及積聚財物主守之人安置不如法晒晾不以時致有損壞者計所損壞之物價坐贓論罪止杖一百徒三年著落均賠還官各等語此案前任彭澤縣甄別降補知縣周巖先則挪

移庫銀散給饑民口糧嗣因批解糧銀遭風沉
失復挪移庫款補解其霉變倉穀照例扣筭計
價在五百兩以上罪止滿徒自應從重照挪移
庫項本例問擬查挪移庫銀共九千九百九十
八兩二錢除查封寓所衣物共估變銀一十兩
三錢八分五釐備抵外實未完銀九千九百八
十七兩零周巖除霉變倉穀罪止滿徒輕罪不
議外合依挪移庫銀五千兩以上者擬實犯杖

一百流三千里例應杖一百流三千里勒限一
年監追霉變倉穀亦限一年賠完戶書陸英賢
於本官挪移庫項不行稟阻倉書王幅瑞於倉
貯穀石並不預為防範應各照不應重律杖八
十折責革役家人孫祥差役陳應押解銀兩遭
風沉失人力難施並非典守不慎應免置議周
巖寓所資財業已查封備抵所有原籍資財亦
准江蘇查無隱寄取結咨覆應毋庸議除供招

咨部外理合恭摺具

奏伏乞

皇上聖鑒敕部核覆施行奉

硃批刑部議奏

請分年扣還盤壩經費銀兩疏

奏為據情恭摺具

奏仰祈

聖訓事竊照本年運河淤墊漕糧盤壩支用經費當
經兩江督臣琦善等將應行歸墊等欸查明列
單奏奉

諭旨由總局墊支剝船運米過閘首進軍船修艙並
折給舵水食米等費共銀七萬三千七百六十餘

兩着於浙江等省糧道扣解歸款等因欽此嗣准
兩江督臣開單咨會江西省應還銀二萬二千
五百一十三兩零應飭糧道如數扣解歸墊等
因業經前護撫臣嵩溥轉行遵照今據督糧道
耿維祜詳稱查江西本年起運軍船除遭風漂
沒外寔出運船六百二十五隻以應還前墊銀
兩按船核計每船應扣銀三十六兩零第本年
各帮因淮河墊阻自水次開行挽抵高郵寶應

一帶守候數月幫情本形拮据加以盤壩過剝
既多虧折例帶土宜又全行起卸且今冬應領
新運錢糧內原有例扣造剝等欸餘剩無多明
歲起運新漕仍須盤壩若再將此項按船扣存
銀三十六兩零不特來年沿途辦理竭蹶轉瞬
兌開置備一切運具亦形支絀再四籌思惟有
請將應還前項墊發銀兩分作六年扣還等情
詳請具

奏前來臣細加體察委屬實在情形合無仰懇

皇上天恩俯准將總局墊發銀二萬二千五百一十三兩零自本年為始分作六年扣解歸欵俾紓丁力而速轉運理合恭摺具

奏伏乞

皇上聖鑒訓示內閣奉

上諭韓文綺奏軍船應扣還江南墊支盤壩經費銀兩請分年扣繳一摺江西省本年起運軍船盤壩

剝運應還江南墊發銀二萬二千五百餘兩應卽按船覈扣歸欸據該撫奏稱各幫船本年自開行後沿途稽阻加以盤剝折耗例帶土宜全行起卸今冬尚有例扣造剝等欸若再將此項如數扣解必致辦運竭蹶自係實在情形着照所請將應還江南總局墊發銀二萬二千五百餘兩准其自本年為始分作六年扣解歸欸以紓丁力該部知道

請將候選衛守備草審疏

奏為特符滋事之候選衛守備請

旨斥革嚴審仰祈

聖鑒事本年十一月十七日據瑞州府新昌縣知縣
馮文燦稟稱有在籍武進士候選衛守備李廷
傑因伊徒蔡倩拖欠東脩稟縣差追未給李廷
傑疑差延擱口角互毆受傷稟驗旋據控府批
提解審時該縣定期開考各童循照舊章先赴

禮房報名填冊十一月初九日忽有並不與考之熊任等聽從李廷傑及李廷傑胞兄李麻前赴禮房阻鬧並將冊卷搶去禮書吳步高等往稟該縣熊任等擁至大堂嚷鬧其時觀看多人喧闐雜還該縣出堂彈壓飭拏該犯等咆哮不服與差爭鬧竟有攜取大堂紗燈木架擲打致傷丁役傷及該縣鼻梁當各逃散等情稟經前護撫臣暨司道派委文武員弁前往嚴拏該府

文祥接據縣稟親詣督率縣營先後拏獲李廷傑並熊佺等十四名訊據熊佺等供係李廷傑與未獲之李麻主使喧鬧李廷傑恃符狡展堅不承認臣查李廷傑因挾差役爭毆微嫌輒敢糾衆滋事拒傷丁役並傷及該管知縣實屬目無法紀有無起衅別故及在場共有若干人數實屬何人起意為首現飭飛速將各犯証解省一俟解到臣卽督同司道等研訊確情照例懲

辦茲據司道府詳請將李廷傑

奏草前來相應請

旨將候選衛守備李廷傑先行斥革以便提同各犯
嚴審一面飭緝逸犯李麻等務獲歸案辦理再
該縣現在開考所有考童及地方俱甚安貼合
併陳明為此恭摺具

奏伏乞

皇上聖鑒內閣奉

上諭韓文綺奏特符滋事之候選衛守備請旨革審
一摺此案江西新昌縣候選衛守備李廷傑因挾
差役爭毆微嫌輒敢糾衆滋事拒傷丁役並傷及
該管知縣實屬目無法紀李廷傑著卽斥革交該
撫提齊犯證嚴訊有無起衅別故及在場共有若
干人數並何人起意為首確切根究務得實情按
律定擬具奏逸犯李麻等飭緝務獲歸案審辦

編查保甲棚民疏

奏為編查保甲棚民循例彙

奏事竊照嘉慶二十年正月欽奉

上諭編查保甲州縣於秋收後先行曉諭各村莊保長人等將本村戶口自行逐細查明造具草冊呈送州縣親往覆查將門牌照改填寫按戶懸掛仍責令該管道府直隸州親往協查稟報督撫交兩司核對具詳督撫於歲底彙奏一次等因欽此又於道光四年

五月欽奉

上諭着各督撫等嚴飭該府州縣將棚民逐細查察按十戶設立甲長每年遞換門牌隨時抽驗禁止匪類潛匿勾串滋事如查有不安本分鬪狠健訟之徒立即嚴拏示懲並不准書吏藉端擾累以靖地方等因欽此當經前撫臣毓岱查明江西省棚民向來均編入保甲

奏明俟秋收後一律查辦在案茲本年秋據各州

縣督率保長人等將土著及棚民戶口逐一查明改填門牌並查察各棚民均係安分守法並無鬪狠健訟及容留匪徒情事經該管道府直隸州按冊抽查報由藩臬兩司核對具詳前來臣查保甲一事為除莠安良善政全在地方官認真查辦庶牌甲各專責成奸宄無從潛匿臣仍分飭各道府州督同所屬實力奉行隨時嚴密稽查毋得日久懈生尤不得假手胥役藉端

滋擾總期匪戢良安仰副

聖主綏靖閭閻之至意謹將編查緣由恭摺具

奏伏乞

皇上聖鑒

附片

再本年江西回空漕船先經前護撫臣嵩溥委員催提臣到任後復又嚴催旋據稟報各船全已抵次查來年重運新漕業經督臣琦善等

奏明提用江南首進二進帮船盤壩接運現在艚
兌開行等事須較常年加緊儻辦以臻妥速臣
諄囑糧道耿維祜嚴督弁丁將各船趕緊修艚
一面飛飭各州縣將徵收漕米勒限趕運派委
員弁沿途迎提務期冬兌冬開不敢稍有延誤
理合附片奏

聞

謝賞福字並鹿肉等件疏

奏為恭謝

天恩仰祈

聖鑒事竊臣齋摺差回捧到

頒賞

御書福字並鹿肉等件當卽跪迎至署恭設香案望
闕叩頭祇領伏念臣猥以凡庸叨承
殊眷封圻任重涓埃莫効於進思恭養

恩深慙悚彌縈於退食茲際祥開玉琯

寵賁彤軒

鳳藻輝煌遠荷自

天之命

龍光咫尺常懷捧

日之誠瑞溢懸堂榮餘加額更沐

賜腥之特沛欣承

高膳之遙頒品重

堯廚熟薦而馨香畢達義叅

義盡敷錫而

福祿攸同臣惟有敬體

皇仁導揚

聖德俾民物咸登康樂沐

泰宇之祥和與班聯共矢寅恭凜素餐於夙夜所

有微臣感激榮幸下忱謹繕摺恭謝

天恩伏乞

皇上聖鑒

請分年緩扣幫丁借支銀兩疏

奏為據情恭摺仰懇

聖恩事竊照江西各幫漕船上年截卸北倉並在楊村起剥借支通庫及天津道庫共銀六萬四千一百五十三兩零應於各丁應領新運錢糧內坐扣解還又廣信等十幫北倉截卸時經倉場督臣奏明在於天津道庫每名借給銀二十兩共銀九千八十兩應先籌解歸欸在於新漕項

下分作兩年扣還均經分別轉行遵照今據糧道耿維祜布政司蘇明阿會詳稱各丁借支通庫天津道庫剥價銀兩原為各省起卸之需急須解還歸欵惟江西幫丁素稱疲乏上年停阻高郵一帶守候數月盤壩虧折丁力更疲本年仍需剥運費用較多應領錢糧歲有常額若將前項借支銀兩按數坐扣領項無幾必致辦運竭蹶迭據幫丁呈請調劑不得不為熟籌惟有

循照嘉慶十三年融借司庫欸項成案請於司庫地丁項下動墊分作五年扣還至另借天津道庫銀九千八十兩道庫現亦無欸可籌應請並於司庫地丁項下墊解自本年冬運為始分兩年扣解歸欸等情詳請具

奏前來臣細加體察委係實在情形合無仰懇

天恩俯准將江西幫丁應行坐扣解還通庫天津道庫共銀七萬三千二百三十三兩零一並在司

庫地丁內動墊解還仍分別在於各船丁名下
分作五年二年扣解司庫歸欵俾紓丁力而速
轉運為此恭摺具

奏伏乞

皇上聖鑒奉

上諭韓文綺奏幫丁借支銀兩請分年扣解一摺江
西各幫丁上年因截卸起剥借支通庫及天津道
庫銀兩均應照原議分別扣還惟念該丁素稱疲

乏兩載以來盤壩剥運需費較多若將前項借支銀兩按數坐扣辦運未免竭蹶加恩着照所請各幫漕船借支通庫及天津道庫共銀六萬四千一百五十三兩零准其援照成案於司庫地丁項下動墊分作五年扣還其廣信等十幫另借天津道庫銀九千八十兩並准其在司庫地丁項下墊解自本年冬運為始分兩年扣還歸款以紓丁力而利轉運該部知道

審辦德化縣地方疎失鞘銀疏
奏為疎失鞘銀獲犯審擬恭摺具

奏仰祈

聖鑒事竊照江西委員署南昌府通判事試用通判
吳家瑛管解雲南銅本銀兩行至德化縣境內
疎失鞘銀經前撫臣成格叅

奏奉

旨署南昌府通判吳家瑛着革職畱於地方協緝德

化縣通遠驛驛丞謝同忻着革職畱任署德安縣
事撫州府經歷丁春林着交部照例議處一並勒
限緝拏所有案內人證着該撫提訊有無串竊賄
縱情弊分別辦理等因欽此查此案先經提到兵
役車夫人等審訊旋據德化縣汛把總詹福訪
知逃犯踪跡知會該縣督率吳家瑛家丁德安
縣兵役及通遠驛弓兵拏獲賊犯王師鶴訊認
行竊鞘銀屬實伊父王禮寬事後知情並起獲

銀兩一並解省委員審擬由藩臬兩司詳解前來臣親提研鞫緣王師鶴籍隸德安縣隨父王禮寬販牛兼習木匠生理素不為匪道光五年江西省撥解雲南省丙戌年銅本銀兩飭委署南昌府通判事試用通判吳家瑛管解銀十五萬兩計裝一百五十鞘於五年五月十六日領銀起程十九日行抵德安縣經該署縣丁春林於二十日按五鞘派差一名移營撥兵一名並

委典史諸家桂隨同委員護解因連日差使絡繹站夫不敷添僱小車推載有車夫柳言善承載三鞘差役朱元兵丁段又發護解是晚解至德化縣通遠驛經驛丞謝同炳點收二十一日該驛丞同委員督率原兵役等管解行至中途適值天雨各夫趕路朱元等因派管之五鞘尚有兩鞘在前行走恐致踈虞且與車夫柳言善素識可靠卽趕前照應詎柳言善忽患痧症腹

痛難行時該犯王師竊攜帶鐵斧覓工路過柳
言善催其代背一鞘王師竊因貧起意乘便行
竊當卽應允議給腳錢八十五文王師竊卽背
負一鞘前行迨至義門鋪地方四顧無人將鞘
背至路旁山窩內藏放待至初更取出身帶鐵
斧將鞘劈破竊出銀五百兩裝入鞘馬忽見前
面犬吠有人肩負鞘馬從僻路跑回將銀埋在
火鑪坑內時柳言善在途不見王師竊趕至德

化縣署將兩鞘交清該德化縣吳名鳳同委員
吳家瑛查知尚短一鞘飛札署德安縣丁春林
於次早會同尋至義門鋪地方山窩水塘邊獲
得餘銀鞘壳鐵斧計被竊銀五百兩差緝無獲
稟經前撫臣成格將委員吳家瑛等叅

奏奉

旨分別革職畱緝畱任飭提兵役車夫人等解省審
辦比王師竊之父王禮寬自外回家王師竊告

知竊情王禮寬容隱卽同王師竊將銀二百十七兩八錢零向不知情之羅仲奇熊本芳牛行販牛先後轉賣王師竊又將銀四十兩向不知情之涂同興程正太各鋪換錢尚存銀一百二十兩餘銀同賣牛及換得錢文陸續花用王師竊聞挈躲避嗣據訪獲追起原贓解審據供前情不諱究明此外並無窩夥竊劫別案及知情分贓之人兵役車夫等委係一時疎忽亦無賄

縱串竊情事查例載竊盜庫貯銀錢首犯數至一百兩以上者擬絞監候至竊盜餉鞘銀兩卽照竊盜倉庫錢糧一例科罪又管押餉鞘失事之兵役依法管解偶至疎失者減首犯罪二等又竊盜同居父兄知情而又分贓者照本犯之罪減二等各等語此案王師竊受雇背送銀鞘竊取餉銀五百兩殊屬藐法王師竊合依竊盜餉銀照竊盜庫貯銀兩一百兩以上絞監候例

擬絞監候秋後處決差役朱元兵丁段又發承
派押解餉銀五鞘因兩鞘人夫天雨趕路前行
恐致疎虞且因與車夫柳言善素識可靠趕前
照應柳言善陡患痧症雇人背送失鞘尚非無
故先後散行犯亦被獲朱元段又發合依管解
餉鞘失事之兵役依法管解偶致疎失者減首
犯罪二等例於王師竊絞罪上減二等俱杖一
百徒三年犯父王禮寬事後知情將銀販牛合

依竊盜同居父兄知情而又分贓者照本犯之
罪減二等例於王師竊絞罪上減二等杖一百
徒三年據供母老丁單飭縣查明取結辦理車
夫柳言善承載餉鞘因病轉雇致被竊逃應照
不應重律杖八十折責發落已獲贓銀三百七
十七兩八錢七分先已歸欵未獲失銀一百二
十二兩一錢三分業由解官等照數賠補仍於
犯人名下追起分別給還該解官試用通判吳

家瑛疎失鞘銀如係地方官獲賊例應帶革職之案仍畱原省差委効力四年無過開復今犯係該員遣丁於一年限內協獲並無餘犯在逃賠銀亦於限內完繳其革職之案應否卽予開復例無明文聽候部議驛丞謝同炘原叅革職應請開復並請將署德安縣事撫州府經歷丁春林照例議結此案獲犯在四個月疎防限外所有該德化縣疎防文武職名仍另行補叅除

供招咨部外合將獲犯審擬緣由恭摺具

奏伏乞

皇上聖鑒勅部議覆施行奉

硃批刑部議奏

拏獲會匪審明定擬疏

奏為審明定擬具

奏仰祈

聖鑒事竊照江西界連閩粵向多會匪節經嚴拏懲辦前據吉安府知府銘惠督同廬陵吉水二縣訪有會匪賴老三詐搶客船情事委員查拏卽據船戶郭文禮具報被賴老三訛詐不遂搶錢逞兇經伊格戡致傷逃走喊同兵役將賴老三

同周配堯追獲呈縣賴老三因傷身死經吉水縣驗明屍傷督率兵役協同清江南康贛縣兵役緝獲魏招仔鍾竈仔劉榮其嚴老結蕭長科由府督訊解省委員審辦旋據泰和縣知縣徐迪惠挈獲李洪發李長生仔訊出李洪發與魏招仔等在豐城黃浦腦地方致傷南昌縣草捕謝沅身死棄屍河內情事稟解赴省又據萬安新建二縣暨各委員先後挈獲黃文禮蕭三仔

王三仔歸案審辦並委員前赴黃浦腦會同該縣打撈謝沅屍身漂流無獲將船戶廖昌海等解訊查驗花帖布旂等物與歷辦會案大概相同並無違悖不法字句茲據委員南昌府知府周繼圻等審擬由臬司邱樹棠詳解前來臣親提研鞫緣魏招仔籍隸贛縣素不安分道光四年六月二十日魏招仔在清江縣樟樹地方路遇南康縣人賴老三稱係添弟會卽三點會內

之人糾邀拜師入會彼此卽有關照可免欺侮
魏招仔允從是夜在該處水口空廟內拜賴老
三為師賴老三買備香燭用桌搭橋設有米斗
內插布旂供設從前傳會之洪二和尚牌位令
魏招仔跪拜鑽橋傳授開口不離本出手不離
三暗號及三八二十一口訣宰鷄取血滴酒同
飲魏招仔送給錢一千文賴老三付給花帖一
張而散魏招仔旋轉傳黃文禮並在逃之葉長

貴為徒又周配堯並李洪發鍾竈仔劉榮其嚴
老結蕭長科亦在贛縣及樟樹地方先後拜賴
老三為師李洪發轉傳王三仔為徒均照前鑽
橋飲酒傳授口訣暗號並未領有花帖內惟蕭
長科王三仔僅止圖免欺侮得受口訣並未鑽
橋飲酒亦未領帖各送給錢三五百文不等嗣
賴老三與周配堯於九月二十五日傍晚路過
吉水縣張家渡地方瞥見郭文禮棉花船隻停

泊河干賴老三起意訛詐邀同周配堯前赴郭文禮船上搜查有無違禁貨物郭文禮不依爭鬧賴老三見艙面放有錢三百餘文搶藏懷內郭文禮斥罵向奪賴老三拔刀嚇唬經水手鍾老五拾石擲傷賴老三左腿並棍毆其左胳膊右臂膊右肘肘右腿郭文禮奪刀賴老三用刀背毆傷郭文禮左胳膊郭文禮掣取菜刀格戳致傷賴老三顙門右跑走郭文禮喊同兵役將

賴老三與周配堯追獲搜回錢文並搜出花帖
布旂等物賴老三至二十七日殞命此魏招仔
等拜從賴老三入會傳徒並賴老三赴郭文禮
船上詐搶逞兇被格身死之情形也又魏招仔
李洪發均與南昌縣草捕謝沅素識道光四年
五月內魏招仔李洪發在吳城鎮地方賭錢被
謝沅看見欲挈訛去錢五百文九月十七日李
洪發同李長生仔在樟樹地方搭坐不知姓之

喜仔船隻赴省覓工旋有魏招仔王三仔鍾竈仔劉榮其嚴老結蕭長科黃文禮與另案會匪蕭三仔亦先後搭船至豐城黃浦腦地方停泊鍾竈仔等因事上岸李洪發在船邀同魏招仔王三仔蕭三仔跌錢賭博維時謝沅搭坐廖昌海船隻亦至該處停歇見而過船喊掣訛詐李洪發起意毆打與魏招仔等商允當向斥罵爭鬧王三仔用石榔頭毆傷謝沅肚腹李洪發順

取小刀戳傷謝沅左肋謝沅用脚將刀踢落魏招仔拾刀嚇戳適傷謝沅胸膛跌倒艙內船戶廖昌海並搭船之僧旭昇等先亦上岸買物同鍾竈仔等回船看見與蕭三仔一同勸散謝沅逾時殞命李洪發畏懼囑令廖昌海等不許聲張並嚇逼僧旭昇等寫給保顧字據商同魏招仔王三仔將屍擡棄河內此又魏招仔與李洪發等共毆致傷謝沅身死之情形也茲據各供

前情不諱究非有心欲殺此外亦無另有傳徒
及別項不法情事其謝沅屍身雖未撈獲而被
毆斃命之時有廖昌海等供證確鑿似無疑義
查例載左道異端煽惑人民為首者絞監候又
例載邪教為從改發回城給大小伯克及力能
管束之回子為奴又律載同謀共毆人致死下
手致命傷重者絞監候各等語此案魏招仔因
南昌縣草捕謝沅屢向訛詐聽從李洪發謀毆

致斃應照鬪殺科斷謝沅身被各傷惟魏招仔
最後刀戳胸膛卽時跌倒身死為重應以魏招
仔擬抵該犯先拜賴老三為師復自行傳徒黃
文禮等令其鑽橋飲酒尚未給與花帖亦應絞
候二罪相等自應歸於會案從一科斷魏招仔
合依左道異端煽惑人民為首者絞監候律擬
絞監候秋候處決李洪發拜師入會雖經轉傳
王三仔一人未給花帖亦未鑽橋飲酒仍應照

邪教為從科斷李洪發除起意謀毆及棄屍已
失罪止杖流不議外應與各自拜師入會鑽橋
飲酒之周配堯鍾竈仔劉榮其嚴老結黃文禮
均請照邪教為從例發回城給大小伯克及力
能管束之回子為奴分別刺字鍾竈仔雖係孀
婦獨子不准畱養王三仔蕭長科被誘入會僅
止圖免欺侮得授口訣並未鑽橋飲酒罪應擬
徒王三仔又共毆謝沅聽從棄屍亦罪應滿徒

從一科斷均應於李洪發等遣罪上減一等各杖一百徒三年到配折責安置蕭三仔訊止賭博並無幫毆情事其另拜陳秀科為師業歸另案從重擬結船戶廖昌海與李長生仔事後知情不報均照不應重律杖八十折責發落賴老三屢次拜會訛詐搶錢罪應絞決今已被格身死應毋庸議郭文禮因被賴老三詐搶逞兇用刀格殺應照律勿論水手鍾老五並免置議失

察牌保人等飭縣查追責懲起獲花帖等件案
結銷燬逸犯葉長貴等飭緝獲日另結此案係
府縣訪聞拏獲究辦失察拜會職名應請免議
所有失察人命並草捕滋事應議及拏獲會匪
應叙各職名飭取另行咨部分別查議除供招
咨部外理合恭摺具

奏伏乞

皇上聖鑒勅部核覆施行奉

硃批刑部議奏

懇恩寬限買補缺穀疏

奏為各屬初限應買缺穀尚未買足仰懇

聖恩寬限事竊照江西南昌等十二府州查報各屬
倉穀有平糶出借霉變折耗交代時作價流交
共缺穀二十四萬二千九百三十餘石或交現
銀或以墊完民欠作抵雖非侵挪究未實貯經
前護撫臣嵩溥

奏明自道光四年十月為始分別穀數多寡勒限

三年掃數買補完足聲明廣信饒州二府尚未
覆到嚴催查辦欽奉

上諭該州縣果能依限買完其從前徇隱折價之咎
尚可寬免如再逾限不能買補足數卽着一併叅
辦等因欽此欽遵在案旋據廣信饒州二府查報
所屬各縣缺穀四萬二千六百六十餘石連原
奏缺穀共計二十八萬五千六百石零內除彭
澤縣周巖霉變穀三千四百三十四石零已歸

叅案另辦外餘應分限買補初限應買穀一千
五萬五千二百六十四石零二限應買穀九萬
四千四百三十三石零三限應買穀三萬二千
四百六十七石零自道光四年十月至五年九
月初限屆滿僅據各屬報買穀八萬六千二百
四十餘石當經前護撫臣嵩溥暨臣先後勒限
嚴催續據報買穀二萬九千六百一十餘石計
初限尚未買足穀三萬九千三百九十餘石臣

查此項缺穀從前徇隱折價本干吏議已蒙

高厚鴻慈給限買補各廳州縣自應依限採買乃初
限應買之穀尚有短絀予以叅辦實屬咎所應
得惟初限穀數較多有原交現銀不敷市值有
原抵民欠催徵未完致未買足亦係實在情形
現值青黃不接穀價昂貴如責令趕買不特賠
累較多且恐有妨民食惟有仰懇

天恩將銅鼓靖安泰和龍泉永新宜黃餘干樂平德

化彭澤興國會昌十二廳縣初限共未買足穀
二萬二千三十餘石寬限五個月維時早稻登
場穀價平減勒令掃數買齊其實缺人員仍停
止陞調署事人員概停委署補缺俟初限缺穀
買足之後再准陞調委補以示懲儆至南安府
所屬之大庾上猶二縣贛州府所屬之定南雩
都信豐龍南安遠長寧六廳縣初限共未買足
穀一萬七千三百六十餘石該八廳縣地瘠民

貧陸路崇山峻嶺水路節節灘河本地產穀不敷民食隣近採買脚費倍增實多賠貼若不予限稍寬辦公愈形竭蹶所有該八廳縣缺穀應請照原奏定限遞展一年卽以本年九月底為初限屆滿俾免支拙而裕採買此次奏請之後如再有逾限買不足數之員卽同督催不力之本管知府一併揭叅其報買上倉穀石責成本管府州盤查結報如有虛捏情事隨時叅辦據

藩司蘇明阿詳請核

奏前來理合恭摺具

奏伏祈

皇上聖鑒訓示內閣奉

上諭韓文綺奏初限應買缺穀尚未買足懇恩寬限
一摺江西南昌等十二府州各屬共缺倉穀二十
四萬二千九百三十餘石前據嵩溥奏明分別勒
限三年掃數買補完足當經降旨准行續據查明

廣信饒州二府所屬缺穀四萬二千六百六十餘石共缺穀二十八萬五千六百石零內除霉變穀石已歸叅案另辦扣至道光五年九月初限屆滿應買補穀一十五萬五千二百六十四石零茲據該撫奏稱僅據各屬報買穀一十一萬五千八百五十餘石計未買足穀三萬九千三百九十餘石本應卽行叅處惟念初限穀數較多有原交現銀不敷市值有原抵民欠催徵未完自係實在情形

加恩着照所請將銅鼓靖安泰和龍泉永新宜黃
餘干樂平德化彭澤興國會昌十二廳縣初限未
買足穀二萬二千三十餘石寬限五個月勒令掃
數買齊實缺人員停止升調署事人員概停委署
補缺以示懲儆至南安府屬之大庾上猶二縣贛
州府屬之定南雩都信豐龍南安遠長寧六廳縣
初限未買足穀一萬七千三百六十餘石並准照
原奏定限遞展一年當卽以本年九月底為初限

屆滿此後如再有逾限買不足數之員卽同督催不力之本管知府一併揭叅其報買上倉穀石責成本管府州盤查結報倘有虛捏情事着卽隨時叅辦該部知道

審擬泰和縣民陳明開京控疏

奏為遵

旨審擬具

奏仰祈

聖鑒事竊據泰和縣民陳明開赴步軍統領衙門呈

控王成山等糾約鹽梟開設鹽廠賭局哄誘伊

子陳鴻賓輸錢逼寫字據糾搶衣物等情奏奉

諭旨此案著交成格親提人證卷宗秉公審訊按律

定擬具奏原告陳明開該部照例解往備質欽此
並准將陳明開咨解到江當經前撫臣飭提人
證卷宗解省審辦去後茲據委員訊供由臬司
邱樹棠鹽法道齊嘉紹解審前來臣親提研鞫
緣王成山原籍信豐縣於嘉慶二十五年遷居
泰和縣馬家洲地方與歐陽楚山素識往來有
信豐縣人郭良萬劉義同王有光等販私到王
成山家窩囤售賣每擔分給王成山錢二三十

文不等後聞查拏嚴緊不復回私道光三年七月間陳明開之子陳鴻賓同王成山至歐陽楚山家間設歐陽楚山起意抓攤賭博均各允從經歐陽楚山堂姪歐陽尚清擺攤王成山與歐陽楚山陳鴻賓並歐陽玉柱等猜壓散場結算陳鴻賓輸給王成山錢二十千文歐陽楚山錢十一千文餘無輸贏陳鴻賓因無現錢寫給票約各散陳明開查知欲將陳鴻賓責處陳鴻賓

畏懼逃避陳明開控縣差挈王成山邀同歐陽
楚山至陳明開家吵鬧牽其耕牛二隻賣錢分
用陳明開赴縣續控王成山等避匿旋經隣人
郭以禮等處令陳明開以被牽牛隻抵算外另
給王成山等洋銀二十四圓將票約付還寢事
嗣陳明開因伊子陳鴻賓潛匿未回心懷不甘
復赴縣府鹽道呈控並控經前撫臣程含章飭
挈將歐陽楚山拘獲解府訊認誘賭牽牛屬實

飭發廬陵縣看管催等王成山未獲歐陽楚山
患病身故經府委員驗訖卽據屍妻歐陽羅氏
具結攔驗將屍棺殮王成山主令屍妻羅氏屍
姪歐陽尚清將屍棺擡至陳明開家詐賴王成
山與姪王功湖並隣婦人等一同往鬧陳明開
家婦女畏懼走避陳明開出阻王成山將其扭
住欲行剥衣挖眼陳明開掙脫逃走王成山等
乘間搶得陳明開家衣物銀錢穀豆俵分花用

陳明開控縣並控府委員會縣押令羅氏將屍
棺領回陳明開復先後控經院司道批行嚴拏
未獲陳明開隨以鹽梟開廠販私窩匪擾民及
書差弊縱等詞赴京呈控茲臣提集研訊據供
前情不諱嚴究王成山並無另犯不法情事臣
查馬家洲地方向多販私結會匪徒歷經懲辦
有案誠恐尚有餘匪潛匿在境先已密飭文武
各官確查現據查明實無另有匪徒滋事等情

此案王成山始則窩囤私販繼復誘賭牽牛嗣因歐陽楚山解郡病故復主令屍妻羅氏等屍棺詐賴搶分贓物實屬擾害估計搶贓值銀八十一兩零王成山除搶奪計贓及賭博各輕罪不議外合依兇惡棍徒屢次生事行兇無故擾害良人發極邊足四千里安置例發極邊足四千里充軍照例刺字到配杖一百折責安置歐陽楚山起意賭博聽從強牽牛隻罪應擬徒業

已病故應毋庸議刑書康映光差役徐漢雖訊
無舞弊情事惟不卽時獲犯詳辦究屬延玩康
映光徐漢均照不應重律杖八十折責革役陳
明開所控各情多已得實應毋庸議王成山分
得賭錢搶贓飭追分別入官給領逸犯歐陽尚
清等飭緝獲日另結該泰和縣先未覺察現已
獲犯究辦應請免議所有失察賭博文武職名
飭取另叅該處馬家洲地方仍飭該縣府會同

營弁不時嚴查密訪有犯必懲以靖地方除供
招咨部外合將審擬緣由恭摺具

奏伏乞

皇上聖鑒敕部議覆施行奉

硃批刑部議奏

請將知縣降補佐貳疏

奏為遵

旨察看才不勝任之知縣請以佐貳降補恭摺具

奏仰祈

聖鑒事竊照前護撫臣嵩溥於甄別案內

奏請將崇仁縣知縣葛東昌宜春縣知縣程國觀

興安縣知縣申祐分別改補調補嗣准部咨奉

旨吏部查明葛東昌任內有降級畱任催徵等案程

國觀任內因疎脫重犯畱任緝拏均與改調之例不符該護撫旣稱葛東昌才具不能開展於公事辦理竭蹶卽應酌量降補或竟予休致何得以違例之員率請改補崇仁縣知縣葛東昌着不准其調補交新任巡撫再行察看奏明辦理宜春縣知縣程國觀興安縣知縣申祐俱着撤回仍畱各本任等因欽此臣查崇仁縣知縣葛東昌現年四十九歲廣西進士道光元年部選今職卽於是年

到任該員於臣未經到任之前先已委解河工
餉銀出省茲差竣回江遵

旨詳加察看並復悉心體訪葛東昌才識拘迂遇事
遲鈍催科聽斷均未能明速其辦公竭蹶誠難
勝民社之任惟年力富強居心謹飭且在江五
年熟悉情形若畱於江西改用佐貳尚足以資
差遣合無仰懇

聖恩俯准將葛東昌以府經縣丞降補仍畱江西遇

有相當缺出酌量補用如蒙

俞允卽飭該員在江候補並飭查明該員任內經手
倉庫錢糧有無虧短另行照例辦理所有臣遵
旨察看緣由理合恭摺具

奏伏乞

皇上聖鑒訓示再查宜春縣知縣程國觀興安縣知
縣申祐尚未卸事遵

旨各畱本任合並陳明謹

奏奉

硃批另有旨內閣奉

上諭韓文綺奏察看才不勝任之知縣改降補佐貳
一摺江西崇仁縣知縣葛東昌前因改調與例不
符交該撫察看辦理茲據奏該員才識拘迂辦公
竭蹶難勝民社之任惟年力尚強熟悉該省情形
葛東昌着以府經歷縣丞降補畱於江西地方遇
有相當缺出酌量補用該部知道

審擬旂丁蕭靜亭京控疏

奏為遵

旨審擬具

奏仰祈

聖鑒事竊照吉安幫旂丁蕭靜亭赴京呈控佃戶欺
隱屯田一案經都察院奏奉

諭旨此案着交毓岱親提人證卷宗秉公審訊按律
定擬具奏原告蕭靜亭該部照例解往備質欽此

並准將蕭靜亭咨解來江當經飭提人卷來省
委員審辦嗣因蕭靜亭堅執原詞應行勘丈驟
難定斷疊經咨部展限茲據委員以蕭靜亭稟
求免丈查訊明確由司道詳解前來臣親提查
訊緣蕭靜亭係廬陵縣軍籍廬軍屯田坐落龍
泉縣二十五六七都地方該吉安幫五十二船
額定屯田七十七頃八十八畝零實徵銀四千
二百九十八兩零分別解給辦運乾隆四十九

年該吉安幫旂丁杜王謝等以乾隆二十四年清查二十五都丈出田一十八頃零二十六七兩都尚未弓丈均被刁佃隱佔控道飭查並無案據嗣據疊控藩司飭委勘詳丈出田二百九十餘畝旂丁岳蔣劉等又以丈溢不止此數係圖造弓割步受賄隱瞞控道批府飭查當據該前署縣俞光豫詳報查出丈溢田四十五頃零卽據佃戶劉宗智等以丈溢屯田係旂丁龔方

伯等賄書加弓增步隨詳翻控經道飭令覆勘
非秋禾在田卽入證未齊具稟展限迨嘉慶十
五年催據龍泉縣湯煦以前次查出丈溢田畝
本非俞光豫親丈是否旂丁賄串浮加屢傳原
告抗延不到無從根究請照例註銷經道駁飭
覆勘未據勘覆道光四年該丁蕭靜亭因傳聞
各佃戶有欺隱墾佔情弊並憶乾隆年間控案
曾經丈溢田畝妄思丈量陞科加租濟運卽查

照乾隆年間原控情節赴縣府具控旋因隨幫
北上遂牽叙原案並添砌該佃等勾串豪民私
相典賣以大換小以熟換荒飛灑租糧赴都察
院衙門具控奏奉

諭旨解回審辦訊據被告佃戶邱裕安等僉供承種
屯田歷係按額完糧並無私相典賣及欺隱墾
佔等事質之蕭靜亭仍執原詞委員前往勘丈
疊經咨明展限在案旋據委員等具稟龍邑屯

田十年清查四年編審均認真查辦佃戶從無私相典賣及以大換小以熟換荒情弊該處佃戶共有八九千戶之多現因查丈率多畏累遠避若俟傳到各佃按畝丈清數年方克歲事揆度時勢殊多窒碍而蕭靜亭目擊情形亦稟求免勘查屯田定例四年編審十年編查專為旌丁典賣欺隱而設至佃戶承耕屯田有無墾闢應如何清查加租例無明文各佃圖得花利曰

漸墾闢原恐不免但龍邑屯田錯雜萬山之中
依山傍澗雨暴則山田沖卸雨久則溪水卽淹
雨旣可虞晴又苦旱本屬極磽之地從前土人
不愿耕種復議徵七免三招募閩粵客民承佃
該佃戶藉耕數畝之屯終歲勤勞以資生計豐
年尚可完租歉收卽多抗欠乾隆年間該縣清
理佃欠准以官山作民山償其開荒之工本佃
民始得相安近年該縣徵收屯租僉派丁書在

鄉設局先飭屯差多方開導令各佃於趕墟之便自行完納若有尾欠漕項緊要則官為墊解徵收還欸此種情形卽照常徵收已非易易若如蕭靜亭所控將該田逐一清丈加租該佃民衣食益復無資非畏累遠逃無人承佃卽多方抗欠纏訟無休且丈量田畝必須傳集佃戶令其呈出田約核明四至畝數又須農隙之時方可呈丈實非數年所能蒞事況吉安幫五十二

船額定屯田數有一定卽有多餘並非該幫應得之屯豈容復有希冀定例丈量田畝及抑勒首報墾田之事永行停止違者以違

制律論推原例意誠以

國家田畝自康熙年間大丈以後賦額已定此後如有增闢畱不盡之地利以益貧民在所不禁現在蕭靜亭所控屯田詰以何處隱墾茫無以對更不便以空言紛紛查丈使八九千佃戶不

能安於生業況江西一十三幫均有屯田此端
一開從此效尤呈丈必致擾累無窮既據自行
稟懇免丈自應如請准免卽從前丈出溢田本
非前縣余光豫得自親丈厯屆編查並無溢額
閒有山頭地角無可起徵自可毋庸查辦俾甦
佃累查蕭靜亭希冀加租飾詞赴京呈控殊屬
不合姑念尚無挾詐別情應請照不應重律丈
八十折責三十板被告邱裕安在省病故看管

人等並無凌虐情弊應毋庸議其餘未到各佃
現值農忙應免提質以省拖累該縣額徵屯餘
飭縣實力催徵毋任延欠並嚴禁各佃戶毋許
私行典賣仍照四年十年例限認真編查以清
屯業而杜弊端除供招咨部外理合恭摺具
奏伏乞

皇上聖鑒勅部核覆施行奉

硃批刑部議奏

審擬候選衛守備李廷傑滋事疏

奏為遵

旨審擬具

奏仰祈

聖鑒事竊照新昌縣在籍候選衛守備李廷傑特符

滋事經臣

奏奉

諭旨此案江西新昌縣候選衛守備李廷傑因挾差

役爭毆微嫌輒敢糾衆滋事拒傷丁役並傷及該
管知縣實屬目無法紀李廷傑着卽斥革交該撫
提齊犯證嚴訊有無起衅別故及在場共有若干
人數並何人起意為首確切跟究務得實情按律
定擬具奏逸犯李麻等飭緝務獲歸案審辦欽此
遵卽飭提犯證來省委員研訊並據該縣馮文
燦稟稱李麻等在大堂拒毆丁役該縣出堂查
問李麻等咆哮不服當飭鎖拏逃跑維時北風

甚大將暖閣屏門吹掩震動閣板致將懸掛紗
舊紗燈散落正值該縣擡頭外看適被燈架傷
及鼻梁因時已黃昏觀看人多辨別不明是以
前稟未將如何被傷之處聲叙茲已查明據實
具稟等情檢查該縣原稟僅稱李麻等拒傷丁
役該縣亦被燈架傷及鼻梁至如何被傷原未
聲明當飭委員核審並據該管瑞州府稟據營
縣續獲李麻解省歸案審辦茲據委員南昌府

周繼圻審明由藩臬兩司審解前來臣隨提齊
犯證督同研訊緣李麻與胞弟李廷傑籍隸新
昌縣李廷傑於道光二年中式武進士以衛守
備選用丁憂在籍五年五月內有同縣人蔡倩
拜從李廷傑學習弓馬嗣因患病辭回共欠李
廷傑脩膳錢三十五千文李廷傑控縣飭差鄒
太等催追因蔡倩外出致未追給該縣馮文燦
因公赴郡九月初六日李廷傑在署前撞遇鄒

太因其不將蔡倩帶案向斥爭鬧李廷傑順用
扇柄連毆鄒太頭上並舉脚踢傷其左肋倒地
昏暈時縣役李松陳高袁順漆細江全李德見
而向罵鄒太之妻龍氏聞知趕至掌毆李廷傑
左右腮脰李松拳毆李廷傑左肋李廷傑失跌
溝內墊傷右耳根並被龍氏潑擲溝內穢泥經
人勸散鄒太李廷傑各赴代行典史驗傷飭醫
李廷傑控府批准提究嗣該縣回署查明將滋

事之李松等管押飭傳人證批解時值該縣示
期考試各童雲集李廷傑稟求該縣先將各役
當衆責懲該縣馮文燦因案已府提不允李廷
傑心懷不甘十一月初九日與伊兄李麻並在
逃族人李濟設及李麻起意糾人混冒考童前
赴禮房吵鬧冀可挾制先責各役洩忿令李廷
傑不可出面並邀允李濟相幫李廷傑未向阻
止李麻李濟隨分邀李花江新漆虎熊凭江毯

熊農李大德並謝佹漆接李金林及在逃之李
煥李芳李輝李祿李順李羊大老一共十八人
走至縣署禮房門首謝佹漆接李金林三人畏
懼走回李麻等見禮房正在填冊向禮書吳步
高等買卷故意挑剔尋衅爭鬧李麻等聲言衙
役毆打紳士之案官不究辦衆童不服特來吵
鬧李濟李煌江新順手在架上搶取冊卷數本
撕毀吳步高胡大元阻奪不住進署喊稟李麻

等追至大堂經堂役漆青攔拏李煥扭住漆青
髮辮李花拳毆漆青左額角肚腹家丁殷升陳
升趕出幫拏李麻抽取大堂木柵毆傷殷升額
顱鼻梁右脚外踝右腿李濟亦用木柵毆傷陳
升額顱左太陽該縣馮文燦出堂查問李麻等
咆哮不服該縣喝令鎖拏李麻等逃跑維時北
風甚大將煖閣屏門吹掩震動閣板致將懸掛
紗舊紗燈散落正值馮文燦擡頭外看適被燈

架傷及鼻梁時已黃昏觀看人多辨別不明該
縣馮文燦稟經該府文祥親詣督拏並經前護
撫臣暨司道派委文武員弁前往會督嚴拏先
後拏獲李廷傑等訊報經臣

奏奉

諭旨將李廷傑斥革嚴訊茲提訊各供前情不諱究
無開堂毆官情事查李麻因伊弟李廷傑挾縣
差爭毆之嫌輒敢起意假冒考童赴署滋鬧拒

毆丁役該縣出堂查問復敢咆哮不服實屬逞
刁挾制自應照例問擬李麻合依刁徒直入衙
門挾制官吏發近邊充軍例加拒捕罪二等發
極邊足四千里充軍李花聽糾往鬧應照為從
律滿徒該犯又拒傷堂役漆青應加拒捕罪二
等杖一百流二千五百里已革衛守備李廷傑
訊未同往滋鬧第事由該犯肇衅迨李麻起意
糾衆挾制一同在場商議卽屬為從且係候選

衛守備應知法紀乃任兄妄為不向力阻尤屬
知法犯法李廷傑應照為從滿徒上加一等杖
一百流二千里江新漆虎熊任江毯熊農李大
德聽糾往鬧並未傷人應各照為從律於李麻
本犯軍罪上減一等各杖一百徒三年分別發
配折責安置謝任漆接李金林聽從同往旋即
走回尚知畏法應各照不應重律杖八十折責
三十板差役鄒太李松與李廷傑爭毆陳高袁

順漆細江奎李德帮同斥罵均屬多事肇衅應
各照不應重律杖八十再枷號一個月滿日折
責草役龍氏掌傷李廷傑應照手足毆人成傷
律笞三十係婦人照律收贖蔡倩欠錢已據呈
繳給領無干省釋逸犯李濟等緝獲另結該縣
馮文燦於各役向李廷傑爭毆先已公出回署
後卽將各役管押候解因案已府提不允先責
並非徇縱不究惟失察衙役滋事例有處分相

應聲明聽候部議除將全案供招咨部外理合
恭摺具

奏伏乞

皇上聖鑒勅部核覆施行奉

硃批刑部議奏

審擬吉水縣監生鄧輝等京控疏

奏為遵

旨審擬具

奏仰祈

聖鑒事竊照吉水縣監生鄧輝等遣抱告鄧以琢同
該縣民劉明耀赴京呈控縣書婁明源等浮收
勒折一案經步軍統領衙門

奏奉

諭旨此案著交韓文綺親提人證卷宗秉公審訊按

律定擬具奏原告劉明耀鄧以琢該部照例解往
備質欽此並准將劉明耀等咨解回江經臣飭提

人卷解省委員訊供卽據鄧輝李魯山劉明耀

劉應燦等以事出懷疑具結呈悔茲據委員南

昌府知府周繼圻等審擬由藩臬兩司糧道詳

解前來臣親提研鞠緣鄧輝李魯山住居吉水

二十八都七圖劉明耀劉應燦住居吉水二十

都該兩圖從前起立義圖圖內派分十甲每年
輪舉甲長各花戶錢漕均交甲長完納道光四
年二十八都七圖輪值鄧姓充甲二十都輪值
劉姓承充該兩圖漕米向係值年甲長以船裝
至丁江倉河下候丁江倉內漕米收竣雇船起
運時卽就船量兌惟船上兌收事在倉卒該花
戶每以潮碎醜米朦混扭交致運省不能兌軍
該縣因於九月內開倉改立章程先期示諭兩

圖甲長凡漕米均應上倉量收不准就船便兌
九月二十六日鄧輝李魯山同未到案之曾榮
芳並武生鄧揚勲鄧綿川運米三百七十餘石
劉明耀劉應燦同未到案之劉其昌運米五十
六石零均至丁江倉河下漕書婁明源令照新
定章程起米上倉水次離倉較遠隨各雇鄉夫
挑運進倉該縣驗明鄧輝等米色潮碎飭令婁
明源照例風篩先量劉明耀等在倉等待鄧輝

等圖內通用八二折鄉桶每鄉桶一石合官斛
八斗二升官斛一石合鄉桶一石二斗一升九
合零婁明源逐石風篩量收因米質碎雜過甚
篩出碎米甚多又鄧輝等在船盤運拋散鄉桶
一石二斗一升九合零合官斛缺少六升量至
十五石共少九斗令其補足鄧輝等不允並以
向係八二折鄉桶兌交疑婁明源將斛剗大與
之爭論當被村斥庫書龍其瑞戶書周正興亦

各斥其非隨據將米補足心疑未釋兼以向在
河下就船便兌既少風篩又無挑運腳費諸多
省事起意呈控冀復舊章並邀劉明耀等一同
幫控劉明耀等亦想就船便兌當卽應允鄧輝
等隨棄米不交捏以向來完米百石折作八十
二石今被婁明源等剗斛浮收每石計大六升
令劉明耀等照依作詞赴府具控批縣查究該
縣因鄧輝等並不交米飭差張恩等往傳正身

花戶赴倉自行完納先後傳到李先賢熊禮培
溫乾明溫文興等李先賢意圖延抗該縣將其
杖責隨據各將名下應完米一十石七斗八升
零赴倉完清其餘花戶未經傳到鄧輝等卽赴
本省院司道各衙門具控批府提訊旋經該府
提到婁明源等發委廬陵縣審辦因人證未齊
將鄧輝交與禮房收管餘俱管押未經訊結時
各花戶被差役催追緊急均向鄧輝等埋怨鄧

輝李魯山並曾榮芳情急卽商同添捏差役訛
索各情遣抱告鄧以琢並邀劉明耀與劉應燦
劉其昌分詞赴京具控此鄧輝等控告婁明源
等之原委也茲鄧輝等因事出懷疑妄控具結
呈悔經該委員訊悉前情臣恐婁明源等實有
剗斛浮收情事嚴加詰訊據供制斛係在糧道
衙門具領收漕完竣卽應繳還如果將斛剗削
過後呈繳豈不立致敗露各花戶又何以均皆

緘默且先由府委員摘傳各花戶查訊均稱丁江倉量米實係制斛並未剋大委無浮收情事復向原被人證反復究詰堅供如一案無遁飾查鄧輝李魯山同曾榮芳以米質潮碎風篩折耗輒疑漕書剋斛浮收并以從前義圖之米係在河下就船便兌今挑運上倉諸多費事冀復舊章商同捏詞具控均屬不合第究因懷疑控告其冀復舊章亦為合圖漕米便於量兌起見

與實在憑空挾詐誣告浮勒有間且於未審以前卽知悔悟據實呈首情尚可原鄧輝應革去監生與李魯山曾榮芳均照申訴不實律杖一百鄧以琢聽從作抱劉明耀劉應燦同劉其昌亦冀復舊章聽從控告均應照為從律於杖一百罪上減一等杖九十曾榮芳劉其昌飭縣查提到案發落鄧揚勲鄧綿川隨同運米至倉疑倉書剗斛浮收棄米不顧雖未隨同上控亦有

不合應照不應輕律笞四十係武生飭傳到案
照例納贖漕書婁明源周步雲訊無剋斛浮收
情事應與並未詐贓之差役張恩等均免置議
鄧輝等未完米四百餘石已於京控後如數完
納上倉應毋庸議該兩都義圖在水次就船便
兌固屬便民第漕米例應上倉近來既以醜米
朦混似未便仍循其舊應飭嗣後一律運倉量
收以杜弊混除供招咨部外理合恭摺具

奏伏乞

皇上聖鑒勅部核覆施行奉

硃批刑部議奏

請將李光海李白腦緩決疏

再臣於五月十四日承准軍機大臣字寄奉

上諭據都察院奏江西萍鄉縣民婦簡蕭氏遣抱告
簡懷茂以羣盜夤夜網搶輪姦等詞呈控如果屬
實殊出情理之外着韓文綺督同臬司邱樹棠親
提嚴訊如該府縣意存消弭竟有化大為小情事
據實嚴叅等因欽此臣查萍鄉縣事主簡相能家
被盜行劫拒傷並輪姦簡相能之妻蕭氏一案

又事主葉榮梅被劫一案先已獲犯李光海等
訊認按擬具

題現於五月二十二日准咨部覆奉

旨李光海着卽處斬梟示李白腦着卽處斬餘依議
欽此應卽欽遵將李光海等分別處決惟簡蕭
氏遣抱告赴京呈控所稱入室輪姦人數與原
辦不符並稱該犯等尚有盜劫輪姦別案是否
原辦不實不盡必須澈底根究李光海原擬斬

臬李白腦原擬斬決如果審有盜劫輪姦別案
在李光海罪無可加李白腦亦止應加臬原可
照例辦理第前經獲案之曾滌塵業已監斃李
長古修冬古均止從劫一次在外接贓於李光
海等入室輪姦本未目擊無可質究臣奉到

廷寄卽已督同臬司委員馳往密查並飛速行提
入證在案應請將李光海李白腦暫緩處決一
俟人證解到提同嚴訊如該府縣有消弭情事

自當據實嚴叅斷不敢稍有諱飾徇隱仍於審
明後卽將李光海李白腦遵

旨處決再將控案定擬覆奏所有 臣奉到
諭旨查辦緣由合先附片奏

聞奉

硃批是秉公審訊不可存袒護消弭之心

覆查保甲完竣疏

奏為覆查保甲完竣恭摺仰祈

聖鑒事竊照嘉慶二十年正月欽奉

上諭編查保甲州縣於秋收後俟各項外出人衆歸里
曉諭各村莊保長人等將本村戶口自行逐細查明
造具草冊呈送州縣覆查將門牌改填按戶懸掛仍
責令該管道府直隸州親往協查稟報督撫交兩司
核對具詳歲底彙奏一次等因欽此又於道光四年

五月欽奉

上諭着各督撫等嚴飭該府州縣將棚民逐細查察
每年遞換門牌隨時抽驗如查有不安本分之徒
卽嚴拏示懲不准書吏藉端擾累等因欽此當經
前撫臣毓岱查明江西棚民向已編入保甲

奏明俟秋收後一律查辦在案茲本年秋收後各
項外出人衆俱已歸里據各州縣督率保長及
族正人等將土著及棚民一體確查改換門牌

懸掛並查各棚民均皆安靜守法經該管道府
直隸州親加覆查相符報由兩司核詳前來臣
逐細體訪所屬地方以及本年被水之區俱各
安貼委無匪徒潛匿情事並仍飭各屬實力奉
行隨時查察不得因本年編查業已完竣稍有
疎懈以仰副

聖主戢暴安良之至意所有覆查保甲完竣緣由理
合恭摺具

奏伏乞

皇上聖鑒

審明安福縣逆倫重犯疏

奏為審明逆倫重犯按律辦理恭摺仰祈

聖鑒事竊照安福縣民陳赤紅搭斃伊母陳蕭氏移屍捏告尹玉堂毆死時值該縣潘黼因公在省經代行典史申經護蓮花廳驗明屍傷訊供臬府飭委永新縣會審究出實情臬解來省委據南昌府等審明定擬由臬司解勘前來臣親提犯證率同司道悉心研鞫緣陳赤紅係陳蕭氏

之子與尹玉堂隣屋居住陳赤紅之祖係尹玉堂家契買僕人久經分出另居並未服役道光元年陳赤紅給錢七十千文向尹玉堂贖回身契五年十二月內尹玉堂無錢使用將陳赤紅屋後樟樹砍賣三株陳赤紅隱忍未較六年二月初八日尹玉堂向陳赤紅借錢不允因陳赤紅曾買易中甫家田畝轉賣與蕭接近為業尚未過糧聲言首告陳赤紅之母陳蕭氏分辯尹

玉堂舉拳欲毆陳赤紅將其推靠門邊尹玉堂
自行挫傷頂心捏被陳赤紅毆傷稱欲稟究尹
玉堂之子尹圖古趕護拳毆陳蕭氏右眼胞倒
地墊傷腦後左臀經隣人尹修吉等勸散初九
日早尹玉堂赴縣具控陳赤紅聞知畏究向母
陳蕭氏愁嘆陳蕭氏欲往拚命陳赤紅因屢被
欺凌心懷忿恨伊母老病受傷旣願拚命不如
將母搭死抵制時陳赤紅之妻陳彭氏與子陳

和昌赴田摘菜陳蕭氏在堂屋坐靠牆壁陳赤紅左手掄住陳蕭氏左額角用右手大二兩指緊搭咽喉致指甲抓傷項頸左當卽氣絕殞命陳赤紅潛將陳蕭氏屍身背赴尹玉堂家廳內安放走回陳彭氏等回家不見陳蕭氏向陳赤紅問知哭泣陳赤紅嚇禁聲張卽捏尹玉堂等毆傷伊母身死報驗究出前情解省審據供認不諱究無知情同謀及在場加功之人查該犯

陳赤紅因屢被尹玉堂欺凌輒將伊母搭斃移屍圖賴實屬罪大惡極陳赤紅合依謀殺父母已殺者凌遲處死律凌遲處死查犯事地方距省在三百里之外臣於審明後卽恭請

王命飭委按察使邱樹棠兼署臣標中軍叅將事右營遊擊曾連鳳將陳赤紅綁赴市曹凌遲處死仍梟首傳赴犯事地方示衆尹玉堂雖係陳赤紅舊家長第欺凌尋衅致釀逆倫重案請照不

應重律杖八十折責三十板再加枷號一個月
犯妻陳彭氏訛無同謀加功其事後知情不首
亦由被夫嚇禁所致應免置議尹圖古毆傷贖
身僕婦陳蕭氏右眼胞並非折傷律得勿論尹
玉堂砍賣樹價照數追給陳和昌具領蕭接近
所買田畝延未過割訛非欺隱應免責罰飭令
收糧過戶以杜訟端除供招咨部外合將審辦
緣由恭摺具

奏伏乞

皇上聖鑒勅部核覆施行奉

硃批刑部議奏